


沈乃文 主編

明別集叢刊 第一輯

第四十冊

黃山書社




沈乃文 主編

明別集叢刊 第一輯

第四十冊

黃山書社



(明)于謙撰 (清)丁丙輯

于肅愍公集八卷附錄一卷拾遺一卷

清光緒錢塘丁氏嘉惠
堂刻武林往哲遺著本

于肅愷公

集八卷

江青署



于肅愍公集序

公之文始行邪世固有身在而文已傳沒則泯亦有沒而後傳弗久遂滅者矣公去是幾何年去世又幾何年而其文始行也邪蓋人之傳以文而文之傳亦以人文而匪人雖工弗傳也雖傳弗遠也可傳矣遠矣而卽不之傳顯晦遲速固自有時若夫感而後興契而後發則存乎其人焉耳亦數也公自少秉大志讀書過目成誦蚤登甲科陟廳仕歛厯中外更四朝數十餘載其磊落之才宏博之學著而爲功業者天青月白匪徒文也發而爲文章者雲行水湧又匪徒人也況一出十八年澤之施於汴爲最久文之作於汴爲最多久則感深多則

于公集序

一

則習遍文之傳宜速也何於茲六紀餘夫然後哀而集梓而行必始於大巡舜江陳子而成於督學定齋王子之手者豈人文感習固然邪是必有心感神契之妙不可知不容已者在焉否則散落如故其不終爲齷壁敝篋物者幾希斯不亦存乎人矣乎斯不亦存乎數矣乎噫尼而後泰公之數則然也獨文乎哉雖然久而後傳則其傳也必久此又將然之數所不容爽者其視傳雖速而旋復泯滅與形俱化者相去遠近又可知矣抑獨今乎哉茲嘉集之就而樂公之文得行始敘此引諸首用誌歲月云余固非能傳公之文者也嘉靖丁亥夏六月既望賜進士第文林郎巡按河南山西道監察御史

新喻一溪簡霄謹書于大梁行臺之清風亭

于公集序

二

于肅愍公集卷之一

賦二首

上元觀燈賦

恭遇上元令節敕賜羣臣觀燈宴飲臣幸際昌期欣逢盛事謹拜手稽首而獻賦曰

聖皇撫運兮總握乾綱化行九有兮功高百王天心眷顧兮帝道遐昌和氣感通兮民物阜康上元三五兮節屆晴陽景象清明兮應乎豐稔天顏有喜兮誕布恩光詔許觀燈兮西掖之旁觀夫龍山峯嶽兮凌乎霄漢鳳閣巍峩兮近乎穹蒼火樹生花不假陽和之力金蓮匝地自成雲錦之鄉銀燭散蘭膏之燄寶鼎熱沈檀之香

于公集卷一

樓臺照影星斗垂芒一炬纔燃萬象咸彰瑞彩昭回簇三島神仙之眾卿雲煥爛現九重麟鳳之祥光飛雲海兮狀魚龍之出沒影迴瓊嶼兮類鸞鶴之翱翔瓶湛玻璃兮浸團圓之皓月簾掛水晶兮粲望潔之秋霜至若公輸獻巧神機發藏左旋右轉規圓矩方機輪運動兮象乾坤之不息華燈照耀兮映日月之輝煌金碧露山川之遠近錦繡攢花柳之芬芳紫閣丹樓瞻雲霞之舒卷玉欄翠檻觀人物之徜徉制作之妙異乎尋常千態萬狀莫能備詳斯時也欣騰宇宙樂奏宮商清而越者若神龍之吟於碧海和而協者猶鳴鳳之在於高岡衣冠駢集環珮鏗鏘森嚴虎衛整肅鵷行梯山航海惟賢

卉裳莫不歡忭而鼓舞踴躍而趨踰於是羅綺席傾瑤漿眾美俱備肆筵畢張列千官而拜舞呼萬歲以稱觴念愚臣之何幸乃際遇乎明良承恩醉飽其喜洋洋爰拜手而稽首謹獻賦以揄揚

雪賦

寒光皎皎曙色蒼蒼客有掬衣而前崆峒子呼而語曰臘前三白之事子能賦否客跪而賦曰嚴乎凜哉冬至之後未成三戌也飄飄揚揚遍滿入荒似鵝毛之碎翦猶蝶翅之輕狂散玉龍之鱗甲布玉兔之疆場比梅花而六出對夜月以清光遠而望之峯巒傳粉全不相類乎秋霜近而視之庭階藏翠卻也彷彿乎冰芒袁安固

于公集卷一

志僵臥林清適與尋芳灞橋詩思最妙藍關馬足難行持漢節則和璫而食賦梁園必置酒而嘗乘舟訪戴映書惟康銷金帳中飲羊羔而低唱紅爐火上烹雀舌以馨香東郭全無履屐定夫專候門牆廣寒宮前條忽幻成瑤階瓊樹章華簷下須臾好似玉宇牙牀宇內三千大千銀界簷前一滴兩滴瓊漿如斯而已其言也詳既而請崆峒子曰三白事態則弟子已吐布矣臘前爲瑞其意云何崆峒子曰噫嘻乎子來前聞瓦釜池蛙者豈足以知黃鐘清越之奏騎跛驢驚駘者曷足以知綠驥白駒之良三白之在臘前也陽氣未發品彙未生根莖尙在於土中枝柯已枯於地下斗柄建丑玄冥司鄉正

欲寒沍以嚴凝方因陽和而發暢蟲蝗有子必斃宿麥之植多繁所以爲治世之禎祥豐年之卜筮也猗與盛哉原其所由豈虛其應實我朝君明臣良民安國泰敷和氣於兩閒播仁風於萬宇由是光岳效靈之地體信達順五穀豐登而爲年之大有也況今下官司馬匹卿大臣撫安黔黎廣推恩化能體皇上之心焉以格豐年之兆也客拜稽首而歌之曰同雲密布兮瑞雪漫漫豐年慶會兮朝野騰懽對閭閻而祝願兮皇圖如磐石之安

雜體詩七十三首

擬古

十公集卷一

妾意如冰清妾心如石堅良人久別離悵望空懸懸所感恩意重豈爲情欲牽但願良人好功名遂超遷九重布恩澤四境無烽煙未卜會面期先遣佳音傳亦足慰岑寂何必常團圓

南國有佳人

南國有佳人皎皎冰雪姿恆恐汗皦白騰粉勿敢施奉身事君子服勤忘燕私一朝成遠別千里長相思願託雙飛翼辛苦良不辭飛來侍君側恩義兩無虧永言執箕帚盡瘁以爲期可望不可卽翹首空嗟咨

遊春曲

垂楊拂地如青絲輕盈不耐東風吹馬上誰家遊俠兒

雕鞍玉勒黃金羈張弓放彈如星馳正中流鸞落樹枝
厭中大笑稱絕奇揚鞭走馬當路歧忽聞歡聲笑語嬉
隔牆竚立情如癡牆裏佳人顰黛眉留情不語知伊誰
分明相望不相知恨無羽翼通佳期夕陽鸞鳥催分離
可憐兩地空相思

春畫曲

東風吹花花不定紅雨紛紛落芳徑喚人曉鳥隔紗窗
巧語關情誰忍聽柔腸百結苦縈回卻似丁香花未開
花開花謝年年事可惜流光如箭催門外紅塵飛紫陌
陌上垂楊弄春色垂楊只解送行人不管行人歸未得

採桑婦二首

十公集卷一

低樹採桑易高樹採桑難日出採桑去日暮採桑還歸
來喂葉上蠶箔誰問花開與花落二眠纔起近三眠此
際祇愁風雨惡割雞裂紙祀蠶神蠶若成時忘苦辛但
願公家租賦給一絲不望上儂身丁男幸免官府責脂
粉何須事顏色收蠶猶未是閒時卻其兒夫勤稼穡
出門行採桑路逢遊冶郎郎君馬上笑相問問儂何事
不梳妝妾云本是農家婦辛苦從夫事箕帚自來不解
施朱鉛裙布荆釵甘白首郎君問妾妾不疑笑殺無端
輕薄兒妾顏如花心似鐵玉潔冰清天自知世閒萬物
不得齊或清如水濁如泥請君前行不必問好把絲鞭
促馬蹏馬蹏追風去如箭儂家掩袂淚如霰出門明日

更相逢郎君避路羞相見

採蓮曲二首

朝採蓮暮採蓮蓮花豔冶蓮葉鮮花好面顏不常好葉似羅帶忽秋早秋風浩蕩吹碧波綠怨紅愁將奈何年年採蓮逞顏色採得蓮花竟何益蓮花雖好卻無情夫婿有情常是客常是客萬里關河歸未得爭如池上錦鴛鴦雙去雙來到頭白採蓮復採蓮採蓮長可憐願比蓮花與蓮葉不論生死根株連

日出採蓮去日暮採蓮歸蓮花如面葉如衣船頭對對鴛鴦飛鴛鴦飛入花深處交頸綢繆無限趣親物關情可奈何扣船齊唱採蓮歌採蓮歌未休心中無限愁如

千公集卷一
何得似鴛鴦鳥雙去雙來到白頭

楊花曲

垂楊飛白花飄飄萬里去多情蜂蝶亂追隨不問依棲向何處人生漂泊無定蹤一似楊花趁暖風今朝馬足西邊去明日車輪又向東可憐不識歸來路一去江山千萬重楊花本是無情物懊惱人生在客中

遠別離

遠別離何時歸出門子女爭牽衣借問此行向何處底事欲留留不住父子恩情深更深可憐不得恆相聚遠別離無限愁山行騎馬水乘舟行人一去蚤回頭

折楊柳

折楊柳折得柔條持在手慙慙贈與遠行人人去書來莫厭頻明年柳發黃金芽卻望歸轅早到家春來春去須臾事莫待漫天飛雪花折楊柳愁思多短長亭畔崎嶇路送盡行人奈爾何

靜夜思

靜夜思何時休終宵展轉聽更籌人生由來不滿百安得朝夕事隱憂功名富貴儻來物目前渺渺春雲浮甲第歌鐘萬戶侯五花駿馬千金裘春風秋月不相待倏忽朱顏變白頭豪華一去難再得壯氣銷沈土一邱但令名節不墮地身外區區安用求靜夜思誰與謀勸君高枕且熟睡窮達由天不用愁

漁父辭

水深得魚多水淺得魚少人閒徑路漫崎嶇天際煙波長浩渺山妻稚子幸團圓百歲生涯共一船收綸罷釣晚風前楊柳穿魚當酒錢酒酣日暮船頭宿醒看江水捧團玉浩歌一曲寫幽情欵乃聲中山水綠山水綠快我心船頭有魚可換酒莫管興亡與古今

節婦吟

淒涼復淒涼世閒好事難久長月圓無奈陰雲蔽花發愁看風雨狂良人恩愛中道絕秋月春花空斷腸空斷腸心不移玉潔冰清天自知翁姑老病兒嬌癡蕭然四壁無遺貲辛勤紡績事家業暮暮朝朝顰黛眉但願翁

姑無恙見成立獨抱窮愁甘受飢甘受飢淚成血九原
無路見良人縱有哀情向誰說

出塞

健兒馬上吹胡笳旌旗五色如雲霞紫髯將軍掛金印
意氣平吞五刺家五刺窮胡真犬豕敢向邊疆撓赤子
狠貪鼠竊去復來不解偷生求速死將軍出塞望戎行
十萬戈矛映雪霜左將纔看收部落前軍又報縛戎王
羽書捷奏上神州喜動天顏寵數優不願千金萬戶侯
凱歌但願早回頭

入塞

將軍歸來氣如虎十萬貔貅爭鼓舞凱歌馳入玉門關

于公集卷一

七

邑屋參差認鄉土弟兄親戚遠相迎擁道擱街不得行
喜極成悲還墮淚其言此會是更生將軍令嚴不得住
羽書催入京城去朝廷受賞卻還家父子夫妻保相聚
人生從軍可奈何歲歲防邊辛苦多不須更奏胡笳曲
請君聽我入塞歌

北風吹

北風吹吹我庭前柏樹枝樹堅不怕風吹動節操棲棲
還自持冰霜歷盡心不移況復陽和景漸宜閒花野草
尚葳蕤風吹柏樹將何爲北風吹能幾時

春風吟

夕陽欲落還未落垂楊拂地東風惡東風雖惡還有情

歲歲能令芳草生草生滿地綠侵衣時見階前蛺蝶飛
卻怪東風無氣力春深不解動芳菲

春日吟

東風浩蕩吹花柳春氣薰人如醉酒草生滿地綠敷茵
桃李無言也笑人笑人年年常是客底事欲歸歸未得
歸未得可奈何太行南北千條路不似離腸宛轉多

眼前花

昨日看花開今朝看花落花落開花落雨無情莫怪夜來
風雨惡人心一似雨中花老少須臾莫怨嗟昨日朱顏
生綠醕今朝白髮映烏紗看花對酒宜醉醒醉醒後還投
賣酒家君不見眼前花

于公集卷一

八

落花吟二首

昨日花開樹頭紅今日花落樹頭空花開花落尋常事
未必皆因一夜風人生行樂須少年老去看花亦可憐
典衣沽酒花前飲醉掃落花鋪地眠風吹花落依芳草
翠點胭脂顏色好韶光有限蝶空忙歲月無情人自老
眼看春盡爲花愁可惜朱顏變白頭莫遣花飛江上去
殘紅易逐水東流

東風吹落花點點依芳草多情還似未開時分付家僮
莫輕掃掃卻明朝又落來來年依舊見花開莫因開落
分憂喜且向花前飲一杯

田舍翁

田舍翁老更勤種田何曾饒苦辛雞皮鶴髮十指禿日
向田間耕且斲雨暘時若得秋成敢望肥甘充口腹但
願公家無負租免使兒孫受凌辱吏不敵門犬不驚老
稚團樂貧亦足可憐憔悴百年身暮暮朝朝一盂粥田
舍翁君莫欺暗中腹剝民膏脂人雖不語天自知

醉時歌

酒滿金杯泛綠波主人半醉朱顏酡請君且就坐聽我
醉時歌人生天地閒一葦浮江河富貴與功名倏然浮
雲過牀頭有酒且須斟囊裏無錢不用尋錢多自古壞
名節酒量何妨江海深劉伶好酒稱世賢李白騎鯨飛
上天石崇元載極奢侈至今千載遺腥羶勸君滿飲不
須辭萬事由天莫怨否蛟龍變化非無日鴻鵠翱翔自
有時醉時歌歌有節酒闌客散我還醒卻上高樓對明
月

千公集卷一

九

獨酌

東風昨夜吹芳草綠漸成陰紅漸老庭前無數落來花
分付家僮莫輕掃開樽獨醉向花前仰面聲呼歌徹天
花殘自有重開日人老何由更少年醉看明月照華顛
還把落花鋪地眠牀頭貯酒三百斛囊底蕭條無一錢
看花對酒且自樂一任春歸喚杜鵑

馬上郎

馬上郎青春好玉勒金羈映芳草芳草茸茸襯落花花

聞亭館知誰家郎君下馬入門去紅裙翠袖留春住留
春住可奈何笑語生香歡愛多烏雲高髻鬱嵯峨尊前
起舞影婆娑酒酣漸覺朱顏酡留情兩眼橫秋波橫秋
波情密密間間凍餒君不知夫妻對面廚中泣

處世若醉夢

處世若醉夢憂樂付等閒百事皆前定對酒且自寬仰
天歌鳴鳴清風吹我冠濁醪滿瓦缶苜蓿堆春盤無人
勸我飲自酌還自歡醉眼白日晚起看明月團拔劍舞
中庭浩歌振林樾丈夫意如此不學腐儒酸

古意二首

千公集卷一

十

妾顏如花命如葉嫁得良人傷遠別別來獨自守空閨
夜夜焚香拜明月月缺重圓會有期人生何得久別離
願將身託蟾蜍影照見良人不寐時

初日出東方光彩照八極飛潛及蠢動咸仰生成力我
願天宇清浮雲掃形迹庶俾陽德亨萬古明不息

大風

大風振林木萬葉皆飛揚如何頃刻閒景物殊炎涼感
之欲太息憑闌對斜陽東籬有黃菊歸來嗅餘香

鯉魚圖

海波拍天流海日當天起神魚大如舟揚鬣復鼓尾崢
嶸頭角信非難變化飛騰頃刻閒等閒吸盡四海水化
作商霖拯旱乾

閨思

東風蕩漾吹花柳春色醺人如醉酒梁間喜見燕將雛
檻外忽聞鶯喚友綠窗倦繡且停鍼搔首沈吟意轉深
卻喚侍兒開繡戶輕移蓮步傍花陰花陰滿地蝶雙飛
相隨戀戀紅薔薇欲向花閒撲雙蝶生憎綠刺牽人衣
歸來長歎臨妝鏡宛轉柔腸還未定還未定誰得知須
與鴉噪庭槐晚又是深閨拜月時

夏日憶故鄉風景

石榴樹底紅巾蹙葡萄枝頭露香玉薰風拂拂自南來
時向高堂埽炎燠湘簾半捲日遲遲竹影參差柳陰綠
紅綃煥爛蜀葵開金彈纍垂盧橘熟端陽佳節競繁華
角黍堆盤映醺醺一從遊宦隔天涯馬首紅塵厭驅逐
有時飛夢繞錢塘此景依然在心目今年夏月居晉陽
南北風土殊炎涼清和已過近五月草木猶自愁飛霜
故園物候不可見塵沙塞草空茫茫雲山望斷幾千里
小樓盡日徒徜徉

讀易

太極本無形陰陽互消長庖犧百王先作易原俯仰卦
畫一以陳人文日宣朗文王繫卦辭吉凶指諸掌周孔
更發明此道該穹壤濂溪論理微康節推數廣程朱述
傳義明白非惚恍半夜一聲雷千門忽然敞月窟與天
根乘風恣來往焚香誦章編悠然動遐想

清明感興

宦遊無定蹤飄飄任南北今年在并州邂逅過寒食花
枝紅欲燃草色翠如織羣鳥鳴閒庭喧啾竟朝夕飛絮
隨東風輕盈黏几席而我與春光相看俱是客春歸已
有期我歸應未得對景不成歡喟然長太息太息復何
爲揮毫題素壁

晝夜長短

晝夜分長短氣候互涼燠晝長宜官府夜短省鐙燭
燭民膏脂燃之非我欲無奈更漏長欲眠還反復起坐
向鏝前中心如轉轂或將既往追或將未來續兵民當
懷綏邊境宜儲蓄化何由而行政何由而肅思之有未

于公集卷一

十一

得還將舊書讀職分所當爲一一在心目夜分方就枕
展轉猶未足奴隸不得眠偶語向廚屋爲此非好勞庶
以償俸祿自從春晝長百事免拘束冠蓋臨高堂咨詢
盡民俗貧者爲寬征饑者爲發粟善長加撫摩豪強使
懾服閭里無橫科倉廩有餘穀簡教厲兵戎公勤披案
牘訴牒旁午來剖斷不留宿雖非霹靂手遇事頗神速
退食時從容吟詩對修竹夜後即安眠何須論榮辱民
財免耗傷奴隸無怨語此事良自知誰能喻衷曲

入春狂風大作加以久無雨雪因以自咎

朔風怒號不得止漠漠埃塵漲天起入春已是一旬餘
翻覺貂裘薄如紙前朝飛雪天上來閒積郊原不盈指

隴間宿麥正青青無雨安能勃然起聖皇愛民如赤子
詔旨丁寧在人耳輕徭薄賦更恤刑天意云何乃如此
撫巡失政固予罪竊祿偷安心獨愧願移災咎及予躬
免使蒼生受憔悴

暇日命僕於盆池養魚五缶種穀以觀生意

盆池養魚缶種穀魚自悠然穀還綠缶中生意亦流通
盆池江湖非局促乾坤二氣本無私高下洪纖均化育
放魚入海化爲龍移穀在地收萬鍾龍飛九天雨萬國
穀布下土蘇羣農乃知此物有神化世閒大小無不容

慈訓堂詩序

母坤道也以養育爲德而主乎慈故爲母者未

于公集卷一

七

始不慈其子慈而能訓者蓋少訓而能底于成
者尤不多見也四明王原之母夫人舜江張天
民先生女也予髫年時識先生高古修潔與人
不苟合長於詩尤工於楷法雖尋常制作若不
經意思而人自以爲不可及蓋天資俊邁問學
充裕使然也觀先生則夫人之賢可知矣夫人
蚤適原之父金溪令中嚴婦居守節屬志篤於
訓誨諄諄然勉諸子以力學而諸子克遵厥訓
底于有成既而原之以校官起家超拜監察御
史擢參山西藩政清慎明決卓然有稱季復登
進士第授秋官尙書郎餘雖未仕亦皆修謹力

學爲鄉里聞人是皆平日訓誨所致原之推本
所自而扁其堂曰慈訓所以表夫人之懿行而
示若子若孫於無窮也大宗伯兼翰林學士楊
先生典詞林諸耆舊皆爲文以識之矣聞嘗徵
予言予嘉夫人之善於教子而原之昆季又能
不負其所教世之爲母子者將於是而取則焉
斯堂之作豈直爲觀美哉因爲詩以歌之

君不見孟軻稱大賢道學冠今古陶侃惜分陰乃心忠
典午當年造就賴慈親剪髮斷機良獨苦君家阿母貞
且賢與古烈女相比肩婦居節操懍冰雪諸孤在膝皆
髫年諄諄訓誨不輟口願汝成立報所天爲言汝家素

于公集卷一

七

閩閩累葉簪組相蟬聯而翁受命宰百里奉法循理人
共傳一朝奄棄遺爾輩我故未忍歸重泉屬纊言猶在
吾耳令我殷勤教諸子汝曹立學能有成爾父雖死猶
不死諸郎感奮日不足恆將此語留心目明師益友資
討論暮史朝經勤誦讀一朝昆季俱登庸萬里雲霄快
鴻鵠伯也繡衣霄漢立季也騰踏雲龍逐眩言名母孟
陶儔大書慈訓懸華屋子能若此親更逸笑引諸孫餉
梁栗滿庭慈竹布清陰繞砌萱花麗遲日

憫農

無雨農怨咨有雨農辛苦農夫出門荷犁鉏村婦看家
事縫補可憐小女年十餘赤腳蓬頭衣藍縷提筐朝出

蒼始歸青榮挑來半沾土茅簷風急火難吹旋燕山柴
帶根煮夜歸夫婦聊充飢食罷相看淚如雨淚如雨將
奈何有口難論辛苦多嗟爾縣官當撫摩

收麥

大麥收割早二麥收割遲帶青摘穗不候熟老稗藉此
聊充飢去年夏早秋又水穀麥無收民受餒今年種來
十二三縱有收成無積累了卻官租餘幾何女嫁男婚
債負多公私用度皆仰給可喜時清無重科有司牧民
當體此愛養蒼生如赤子庶令祿位保始終更有清名
播青史刺史民肥已天地知國法昭昭不爾私琴堂公暇
垂簾坐請誦老夫收麥詩

于公集卷一

喜雨行

夏田得雨苗青青秋田得雨畝易耕夏田秋田俱得雨
農家不用愁收成收成有望人心悅四方萬國騰歡聲
嗟予非才忝巡撫慚無德澤被蒼生但願風調雨順民
安業我亦走馬看花歸帝京

夏夜步月

明月入我戶清風吹我衣散步下瑤階仰看星斗暉萬
籟寂不聞羣動咸息機嘯歌振林藪鳥雀爭分飛興盡
卻歸來此意知者稀

酒凍戲題

我有一尊酒欲酌誰與其置之向牀頭僮僕不敢動虞

暮天苦寒忽然結成凍開尊撫掌笑有物必有用更添
麪藥作酸醢飽茹黃齏三百囊

無題四首

人生不滿百常爲千歲計圖利與求名昂昂爭意氣晝
營夜復思顧恐力弗至一旦壽命終萬事皆委棄卓哉
陶靖節不爲世故累解印歸柴桑清風滿天地尊中幸
有酒自酌還自醉借問寰中人誰能會此意

朝在太行南暮在太行北問予何事苦怱怱鞍馬驅馳
常是客笑而不答心自知眷戀浮名好是癡昨日朱顏
如帶酒今朝白髮已成絲遠離鄉國空勞夢悵望庭闈
有所思君寵親恩俱未報竊祿無功補盛時太行山不

于公集卷一

可攀誰似山頭白雲好纔成霖雨便知還

名節重泰山利欲輕鴻毛所以古志士終身甘縕袍胡
椒八百斛千載遺腥臊一錢付江水死後有餘囊苟圖
身富貴剝削民脂膏國法縱未及公論安所逃作詩寄
深意感慨心切切

篝鐙夜窗下撫卷坐來久泛觀古豪傑際遇豈不偶伊
周及房杜股肱戴元首韓范與富歐麴蘖成醴酒勳業
震當時功名垂弗朽李廣命不侯馮唐成白叟開闢逐
常調遇事亦掣肘賦命有疾徐奔競適足醜掩書對明
月且盡杯中醪

自歎

我生四十餘已作十年客百歲能幾何少壯難再得今
朝太行南明日太行北風雪敝貂裘塵沙暗金勒寒暑
互侵淩彫我好顏色齒牙漸搖脫鬢髮日以白位重才
不充況此遲暮迫爲上乏勤勞爲下無德澤揣分宜退
休非惟慕奇特早賦歸去來庶免清議責

夜聞鶴唳有感

齋居無四鄰庭空篆煙冷明月揚素輝修簟散疏影雙
鶴向我鳴鼓翅復引領靈風振綺衣華露浥丹頂清響
徹雲霄萬籟悉以屏芝田在何許遙遙隔塵境欲去還
未能蹉跎駐光景聽此融心神令人發深省

梅花圖爲嚴憲副題

于公集卷一

十七

我家住在西湖曲種得梅花遠茅屋雪消風暖花正開
千樹瓏璚綴香玉有時抱琴花下彈有時展易花前讀
浩然清氣滿乾坤坐覺心胸絕塵俗一從遊宦來京師
幾度梅花入夢思爲君展卷題詩處還似開窗對月時
醉墨淋漓染毫素筆底生春若神助調和鼎鼐愧無功
何時卻踏西湖路

賀旌表義民李福山壽慶題具

人閒有至樂無如奉親好翁嫗兩康健靈椿應萱草芝
蘭秀庭階綵服日旋繞定省必以時殷勤候昏曉親情
既悅豫於以增壽考小郎勤學業經書悉論討早晚擢
巍科致身青雲表封誥頒紫泥雙親猶未老乃知盡孝

者不獨在溫飽作詩寄深意具慶期永保

雨後寫懷

甘雨沈塵爽爽氣滌煩襟參差庭前樹翳蔚敷繁陰飢
風冷然來好鳥送佳音俯瞰池塘水鄰鄰清且深中有
雙鯉魚隨波恣浮沈觀茲節物佳擊節動謳吟萬事無
足論大化契我心

池邊散步

臨池樹影半敲斜晴波漾漾走金蛇簾前燕子掠飛蝶
池面魚兒吹柳花遊絲牽風白日靜落紅滿地青春賒
數聲嘯鳥助幽興門巷彷彿山人家

寄內

于公集卷一

太

結髮爲夫妻恩愛兩相好生男與育女所期在偕老我
生叨國恩顯宦亦何早班資忝亞卿巡撫歷邊徼自愧
才力薄無功答穹昊勉力効驅馳庶以贖天討汝居輦
轂下閨門自幽悄大兒在故鄉地遠音信杳二女正嬌
癡但索梨與棗況夜家清貧生計日草草汝惟內助勤
何曾事溫飽而我非不知報主事非小忠孝世所珍賢
良國之寶尺書致殷勤此意諒能表歲寒松柏心彼此
永相保

憶老婢

吾家有老婢行年近五十雖云極醜陋所幸少過失我
昔少年時垂髫髮如漆銳意取功名辛苦事紙筆雙親